

Im Jahreslauf

Gedichte

BENNO BÜCHEL

Z Balzers

Zwöschet Bärg und zwöschem Rhii
lit a Dorf, so schmuck und fii.
Zmetzt do dinn, be Huus und Härd,
stoot a Burg, stoot Guatabärg.

Drei Kämm im Oschta, wo am Änd vom Groot,
a Krüz am Mettlerspetz domm stoot.
Der Falknis, d Luziastääg und Liida
trännend ab üüs gega Süüda.

S Ällhorn und der Rhii
fredend üüs im Wäschta ii.
Im Norda sind s di langa Wesa,
vo döt goot s witer gega Tresa.

Wär zücht scho gärn vo üüs awägg?
Jeder freut se a däm Flägg.
Sövel git s, am längschta der Pföö,
z Balzers isches ääfach schöö!

Maiakäfer

Äs sorret und brummet, am Feeschter an Spick,
wänn d luagescht an Käfer, an schööna, so chic.
Hunderte, Tausege flüügend umanand,
Mäls ischt Maiakäferland.

Da Taag door suacht er grüne Blätter,
er findet s halt im Schatta glätter,
am Oobet erscht goot äär uf d Walz,
sis einzeg Ziil ischt nograd d Balz.

D Eier, wo d Wiible in Boda legend,
krüüchend scho baal as Ingere dor d Gegend.
Das Zefer ischt an allna Worzla draa
und foocht i drei Joor weder as Maiakäfer aa!